

B. N. C.  
FIRENZE  
1065  
7



III  
LEOPOLD.  
de A.C.

1791

7

XIV

LEOPOLD

de Habsbourg

Leopold de Habsbourg  
de Habsbourg



1065. 7

1065.  
DISSERTATIO INAUGVRALIS  
MEDICA

De

A L C E,

Magnô illô Septentrionis Animalî,

Ejusque

V I R T V T I B V S,

Quam

PRÆSIDE

SVPREMO NVMINÈ,

*Indultu Gratiſſimæ Facultatis*

*MEDICÆ,*

In

Celeberrima, & Perantiqua Rauraco-Helvetiorum  
VNIVERSITATE,

PRO

*Summis in ARTE MEDICA Honoribus,*

*& Privilegiis Doctoralibus, more Majorum  
ritè conſequentis,*

Die III, Junij Anni M. D. CC.


Locò horisque ſolitis

*Publico Eruditorum examini ſubmittit*

IOHANNES FRIDERICVS LEOPOLD,  
Lubecenſis.

— (o) 90 — (o) 90 —

BASILEÆ, Typis JACOBI BERTSCHII.





V I R O

*Magnifico, Amplissimo, Prudentissimo,  
& Consultissimo,*

DN. IOHANNI RITTERO,

J.V.L. Comit. Pal. Cæsareo, & in Libera Sacr.

Rom, Imper. Lubecensium Republica Consuli

Primario Gravissimo, Genitori

Genitricis suæ Honoratiss.

Vt &

V I R O

*Nobilissimo, Amplissimo, Excellentissimo,  
atq; Consultissimo,*

DN. ACHILLI DANIELI  
LEOPOLD,

J.V.D. Celeberrimo, Parenti suo Venerando:

Hanc

*Inauguralem Dissertationem*

*ex*

*devota mente consecras*

AVCTOR.





## PRÆFATIO.



*I*mmensas inter atq; innumerabiles istas arumnas, quibus hodiernus sacra Medicina status turbatur, primas sanè tenet perversa illa Opinio, quæ ejus cultores seducti, semper exotica indigenis præferunt. Probant hoc pro detegendis novis plantis atq; animalibus suscepta itinera. Docent idem varia atq; vasta volumina, exoticorum descriptionibus ac elo-  
giis referta. Confirmat deniq; omnium firmissimè quotidiana experientia, cum tam in Pharmacopæorum thecâs, quàm in Medicorum formulis exotica primum, indigena verò ultimum locum occupare, imò interdum ex Pharmacorum ordine & Medicorum mente penitus fermè proscrip-  
ta videamus. Neglecta enim & abscondita quasi jacent ea, qua patria profert tellus, atq; ex Philiatorum usu prorsus sunt exclusa, utpote existimantium, nullum tempus inutilius consumi, quàm quod indaganda plantarum, animalium, ac mineralium, in patriâ occurrentium, indoli impenditur. Cum tamen provida rerum mater Natura cuiusvis Regioni medicamenta, morbis in eâ vel frequentibus vel endemiis contraria, abundè suppeditet, imò in porrigendis specificis quandoq; luxurietur. Sic Larices horrendorum alpium incolis, & plurimis casibus subiectis optimum balsamum vulnerarium in terebinthinâ suâ largiuntur. In Comitatu Tyrolensi, & Valle siâ Helveticâ cernimus quidem multis in locis omnes fermè homines strumosos, ex aquarum mineralium potu tales evadentes,

verum & ibi quoq; deprehendimus fontes morbum hunc  
optimè curantes. Et Nasturtium, Cochlearia, Trifolium  
& acetosum & fibrinum, aliæq; planta antiscorbutica  
nullibi frequentius progerminans, quàm in maritimis re-  
gionibus, quarum incolæ Scorbutico præ cateris vexantur.  
Qua dum paulò attentius nobiscum reputavimus, & de  
Themate quodam Inaugurali eligendo fuimus solliciti,  
nullam materiam proposito nostro magis arridentem,  
quàm præsentem de Alce, invenire potuimus. Nam ma-  
ximum est, ut multa paucis complectar, animalium qua-  
drupedum gelidi, quem inhabitamus, Septentrionis, ma-  
gnusq; ex ipso in Medicinâ expectandus usus. Integrum  
autem de hoc Animali absolutumq; opus Tibi B. L. haud  
pollicemur, cum neq; sufficienti ingenii acumine, atq; de-  
bitorum requisitorum apparatu simus instructi, neq; in-  
stituti nostri ratio hoc permittat; quippe qui ex Superio-  
rum mandato specimen saltem quoddam, pro summis in  
Medicinâ honoribus more Majorum impetrandis, con-  
signare, illudq; publicè ventulandum exhibere nobis pro-  
posuimus. Interim illuminet Divinum Numen mentis  
nostra caliginem, quò præsens labor in Nominis sui glo-  
riam, proximiq; salutem ac emolumentum vergat. Abs  
te verò B. L. studiose petimus, ut pauca hæc foliola a-  
quò animò perlegere, & si qua forsân in tractatione de-  
siderari queant, mediocribus ingenii viribus condonare,  
conatusq; nostros in meliorem partem interpretari, erro-  
res etiam, quotquot eorum occurrent, æquâ lance per-  
pendere, & humaniter corrigere ne graveris.

# TRACTATIO IPSA.

## THES. I.

**S**upervacaneam quidem ac inutilem prorsus operam nonnulli appellant, verborum extricationibus atque enodationibus immorari; nimirum aures tantum inani verborum sonitu, non mentem, fatiantem. Ast cum certum sit, nomina non solum signa, quæ diversa subiecta à se invicem distinguant, sed etiam certos quasi characteres existere, qui nos in certiore rerum cognitionem deducant, variosque ambiguitatum plexus, quibus sæpius irretitæ sunt, solvant: non inutile fore duximus, si de ALCE pauculis hisce pagellis hæc vice acturi, genuinum ejus nominis ortum atque sensum historiæ ipsi præmiserimus. Quod itaque *vocem* Alcis attinet, plurimi eam græcanicam esse volunt, originem δὲ τῆς ἀλκῆς, quod fortitudinem, auxilium & remedium denotat, non sine ratione derivantes; quippe quod hoc animal præter insigne, quod præditum est, robur, de partibus suis, ut infra dicendum erit, medicamina atque auxilia ægrotantibus concedat. *Latini* vocatur Alce vel Alces: *Germanicè* Elend / Ellend / aut cum aspiratione Hellend / vel enim, ut vult Frantzius *Hist. Animal.* c. 10. quia edit vocem, ab ipso auditam; admodum flebilem & aded miserabilem, ut, si non conspiciatur, infantis ejulatum mentiatur; vel ob miserum statum, dum sæpius Epilepsiâ correptum, omnibusque sensibus orbatum creditur: vel etiam ob nimiam timiditatem, quodque ex conspectu tantum proprii sanguinis mortem oppetat. *Galli* nominant la grande Beste; *Scoti*, Gallos imitantes the great Beast. Conspirantes item *Itali* Magno Animali. Ab *Anglis* Elk, *Danis* Elsdieur, & à *Svecis*, *Norvegis*, *Finlandis*, *Lappomburg*, *Ælg*, *Elg*, *Elgar*, *Rajo*, *Wormio*, *Schäffero* atque *Olao* Magno testibus, appellatur. *Curoni* Alcem voce Bredhis, quod robustum, pingue & procerum in istâ linguâ significat, autore *Dis. Philo-soph. de Alce*, exprimunt. *Peloni*, referente *Gesnero*, qui ab indige-

digena accepisse asserit, feram hanc Pouvod dicunt: & ab *Illyriis, Lithuanis atq; Moscovitis* Lofs & Lozzi, Herbersteinio & Schässerò confirmantibus, nuncupatur. His recensitis appellationibus coronidis locò varia adhuc, & ex attributis desumpta, addimus nomina, quibus hæc fera ab Autoribus aliquot fuit insignita, dum aliæam *Animal Magnum*, vel *Magnam Bestiam* ob insignem corporis molem, alii ob aliqualem pilorum in colore cum asininis convenientiam, & aurium nimium propendentium longitudinem, cum Olao Magno *Onagrum s. Asinum sylvestrem*, alii denique, quamvis malè, *Bisonem Plinii*, & *Tarandum* cognominarunt,

## S. II.

Ne ergò & nos in eundem incidamus errorem, notari volumus, quod hic Alcis titulò haud complectamur feram Novi Orbis, eòdem nomine ornata, quæ ungulas trifariam divisas, & crinium loco gibbum, ab humeris ad frontem usque protensum habere, eòque quasi cornu inter vepres ac ramos uti, quò sibi viam pareret; interdiu quiescere, nocte errare, à Simone Majolò, *Dier. Canicular. Tom. I. Colloqu. 7. p. m. 104.* traditur, & à nostro animali, ut mox patebit, prorsus est aliena. Multo minùs sub Alcis nomine intelligimus *Alcidam*, fabulosam illam, & Poëtis olim notissimam feram, de quâ  
 “ Diodorus Siculus *lib. 4. rerum antiquarum p. m. 93.* inquit: “ Mi-  
 “ nervam ferunt Alcidam peremisse, feram stupendam, ex ter-  
 “ rà natam, & antea, ut quæ naturâ plurimum ignis ex ore e-  
 “ vomeret, insuperabilem pugnâ. Ea primùm in Phrygia ap-  
 “ paruit, regionem quandam comburens, quæ hucusque exusta  
 “ Phrygia dicta est. Deinde ad montem Taurum descendens,  
 “ sylvas continuas usque ad Indos incendiò vastavit. Postmo-  
 “ dùm per mare in Phœniciam reversa, sylvas Libani incendit,  
 “ perque Ægyptum in Lybiam profecta, ad loca pervenit occi-  
 “ dua. Postremò, sylvis circa Ceraunia destructis, omnique in-  
 “ censâ patriâ, cum homines partim flammâ absumpti essent,  
 “ partim timore patriam relinquentes ad remotiora diffugerent  
 “ loca, Minervam ferunt, tum sapientiâ tum fortitudine ac vi-  
 ri bus

ribus fratrem, eam feram necasse, pellem pectori circumdedit-  
se, tunc vestitus tutelæque corporis gratia, tunc ad virtutis  
partæque gloriæ memoriam ostendendam. At verò Alcidae  
Mater Terra commota, Deorum hostes gigantes peperit." Sed  
mittamus fabulas! eas ad Poëtarum scholas ablegando; &  
nos ad veram Feræ nostræ historiam convertamus.

### §. III.

Evolventibus igitur pro adipiscenda certiori Alcis notitiâ  
Veterum Scriptorum monumenta, primus omnium, qui hu-  
jus animalis mentionem fecerunt, sese nobis offeret Pausa-  
nias, in *Bæoticis* ita differens: "Alce nominata fera specie  
inter cervum & camelum est: nascitur apud Celtras, explo-  
rari, investigarique ab hominibus animalium sola non po-  
test, sed obiter aliquando, dum alias feras venantur, hæc  
etiam incidit. Sagacissimam esse ajunt, & hominis odore  
per longinquum intervallum percepto in foveas & profun-  
dissimas specus sese abdere. Venatores montem vel cam-  
pum ad mille stadia circumdant, & contracto subinde am-  
bitu, nisi intra illum fera delitescat, non aliâ ratione eam ca-  
pere possunt." Hunc servatò ætatis ordine excipiunt Julius  
Cæsar, atque cum Plinio Solinus, quorum alter *Libro VI.*  
*de Bellô Gallicô p. m. 247.* de animalibus Hercyniæ sylvæ a-  
gens in hæc erumpit verba: "Sunt item (in hac sylvâ) quæ  
appellantur Alces. Harum est consimilis capreis figura & va-  
rietas pellium; sed magnitudine paulò antecedunt, mutilæ-  
que sunt cornibus, & crura sine nodis articulisque habent,  
neque quietis causâ procumbunt; neque si quò afflictæ ca-  
su conciderunt, erigere sese aut sublevare possunt. His sunt  
arbores præ cubilibus. Ad eas se applicant, atque ita paullum  
modo reclinatæ quietem capiunt: quarum ex vestigiis quum  
est animadversum à Venatoribus, quò sese recipere consue-  
verint, omnes eò locò, aut è radicibus subruunt, aut acci-  
dunt arbores tantum, ut summa species earum stantium re-  
linquatur. Huc quum se ex consuetudine reclinaverint, in-  
firmas arbores pondere affligunt, atque unâ ipsæ concidunt."  
Alter vero *Lib. VII. Hist. Nat. p. m. 501.* de Alce sic fatur: "Se-  
pten-

“ptentrio fert & equorum greges ferorum, sicut afinorum Asia & Africa: præterea Alcem, ni proceritas aurium & cervicis distinguat, jumento similem.” Cui assentit Solinus, quando *Polyhist.* c. 20. dicit: “Est & Alces mulis comparanda, aded propensò labrò superiore, ut nisi recedens in posteriora vestigia nequeat.

#### S. IV.

Mira hæc Autorum in depingendò unicò hoc animali varietas, dum alius illud ad Jumentorum gregem, alius ob pellem variegatam ad Capreas refert, alius medium quid inter Cervum & Camelum censet, alius ipsi cornua assignat, alius verò illi denegat, ansam dedit quibusdam dubitandi, num Veterum Alce idem sit Animal, quod hodiernum sub eodem nomine populis Septentrionalibus notum est? quippe cum autopsia ipsa enarratis descriptionibus, & inprimis Cæsarianæ maximè contrarietur. Sed nec desunt, qui Veterum effata cum Modernorum relationibus conciliare nituntur; dicentes, Cæsaris verba de varietate pellium Alcinarum non absolutè, & acsi semper variæ sint, sed respectivò sensu esse accipienda, cum ex patriis scriptoribus constet, hoc animal pro diversâ anni mutatione pilos quoque, Damarum ad instar, mutare. Neque cornuum vel præsentiam vel absentiam aliquam indicare differentiam, quoniam Alce, quam Cæsar nobis cornubus denudatam sistit, pro sæmellâ, Alces v. Pausaniæ visa pro mare haberi queat. Concedimus quidem ipsis propositam combinationem, quando autem Alcem Cæsareanâ, suffraginum flexu carentem, cum Alce Moscoviticâ, juncturis crurum atque flexuris itidem destitutâ, comparare volunt, hâc vice, ob defectum Autorum, hoc assertum probantium, ipsorum sententiæ subscribere veremur: quin potius cum Dodonæo firmiter nobis persuademus, Alcem Cæsaris minimè illud Magnum Animal Septentrionale, Esend vulgò dictum, existere, sed ad Machlin l. Achlin Plinii, & Solini feram innominatam, è Scandinaviæ Insulâ missam, ob actionum similitudinem esse referendam. De reliquo non mirum, Scriptores priscos ita à se invicem discrepare, cum Animal hoc  
rari-



rarissimè, & non nisi in Festis atque Ludis secularibus ad amphitheatralem pompam augendam, ipsis obvenerit, uti hoc confirmat Julius Capitolinus de Gordiano Sen. Imperatore sic scribens: "Extat sylva ejus memorabilis, quæ picta est in domo rostratâ Cn: Pompeji, quæ ipsius & patris ejus & proavi fuit; quam Philippî temporibus vester fiscus invasit. In quâ picturâ etiam nunc continentur Cervi palmati ducenti mixtis Britannis: Equi feri xxx. Oves feræ C. Alces X. Tauri Cypriaci C. Struthiones Mauri miniati ccc. Onagri xxx. Apri CL. Ibices CC. Damæ CC." Et in vitâ Gordiani 111. "Fuerunt sub Gordiano Romæ Elephanti xxx. & 11. quorum ipse x11, miserat, Alexander x. Alces x. Tigres x. Leones mansueti Lx. Leopardi mansueti xxx, Belbi (i. e. Hyænæ) x. gladiatorum Fiscalium paria mille; Hippopotamus & Rhinoceros unus; Archoleontes x. Camelopardali x. Onagri xx. Equi feri x L. & cætera animalia innumera & diversa: quæ omnia Philippus ludis sæcularibus vel dedit vel occidit."

### S. V.

Nos igitur cum Recentioribus, & quibus frequentior hujus animalis concessa fuit inspectio, dicimus, esse *Quadrupes ruminans bisulcum*, cornubus deciduis, staturâ suâ ad servum proximè accedens, præter quod cum corporis mole antecellat, & quadrangulæ partium speciei conformatione ab ipso differat. Secuti sumus hac in parte Clariss. Rajum in *Synopsi animal. quadruped. & Serpent. gener.* qui animalia in certas suas classes redigendò, Alcen obannum cornuum solidorum atque ramosorum deciduentiam, tanquam præcipuam notam characteristicam, ad Cervinum genus retulit. *Ruminans* autem appellamus, quoniam organis ad Ruminationem requisitis à Naturâ est dotatum: *Ore*, videlicet, dentibus primoribus in superiori maxilla destitutò: deinde *galâ* seu *Oesophago* è duobus musculis oppositis, quorum alter cibum ad ventrem depellit, alter verò eadem viâ pabulum in os, ad ruminationem perficiendam, repellit, constante: & tandem *quatuor ventriculis*, quorum *primus*, κοιλία μεγάλη s. magnus venter dictus, cibum leviter commansum excipit, eundem aliquandiu retinet, &

B

deinde

deinde maceratione emollicum eruat, ut in os postea ad masticandum probè retrudatur. *Secundus*, qui à similitudine ex favorum cellulis, quas internâ suâ superficie aliquatenus repræsentat, desumptâ *κικιφάλου* seu Reticulum nominatur: ut & *Tertius*, græcis *ἑξήντης*, Latinis Centipellio, & Germanis ob multiplicem membranarum inæqualium plicatarumque numerum *Mannigfalt* nuncupatus, ad conterenda lævigandaque assumpta contexti videntur. Qui succedit *quartus* & *ἄνωρος*, Abomasus atque Asellus vocatur, fermentum quoddam acidum præparat, cujus ope, ut & plagarum, quibus internè distinctus est, plurimarum motu cibum ulterius perfici, credere fas est. Plura qui de recensitorum quatuor ventriculorum structurâ, & eorum officio scire desiderat, consulat Celeberr. Peyerum in aureo de *Ruminantibus atque Ruminatione* tractatu eruditissimè atque prolixè differentem. Associamus Ruminanti *bisulcum*, pro taxando errore Autorum, qui Alcen ob ipsi affictam ungulam haud divisam inter quadrupeda solipeda s. Solidungula numerarunt. Quod denique vastâ corporis magnitudine Alce Cervos vincat, patet ex collecta partium proportionem, in ejusmodi Animali occisò à Gœbelio Seniore institutâ, & à filio in *Epistolâ de Alce* sequentibus notata verbis: "Pectoris latitudo habuit xxii. uncias, aurium longitudo xi. eandem latitudo ix. à pectore ad genua erant etiam xxii. unciae, capitis longitudo xxvi. pollicum: circa crura posteriora altitudo Lxxxii. pollicum fuit, quæ sex Romanos pedes explent, nam mensurantis pollex unciam, quarum xii. pedem Romanum faciunt repræsentabat. Jam si truncò corporis altitudo colli & capitis adjiciatur, ostenos pedes, & cum cornubus novenos ferè superare videbatur." Quod assertò Wormianò corroboratur, quando in *Musæi sui descriptione* p. 336. testatur, Alcen magnitudine & proceritate Equum superare, imò in Norrvégiâ tantam observatam fuisse, ut sub ventre ejus quis stare valeret; quamvis ordinariò crassitie, altitudine & proceritate equum Turcicum accedat.



Hisque præmissis agendum Alcen nostram secundum singulas corporis sui partes aliquantò penitius consideremus, ut eò clariùs elucescat, quibus cum Cervo conveniat, & quibus ab ipso existat discriminatum. Quò autem eò meliore hoc fiat ordine, à capite tanquam editiori loco capiemus initium, ad reliqua semper inferiora usque ad calcem, naturæ ductum sequendo progressuri. *Caput* itaque tam in masculino, quàm in fœmineo sexu magnum est, & cervino oblongius, figurà & colore mulino respondens, adeoque minus decorò aspectu. *Nares* patulæ sunt & amplæ, imò quandoque tantæ capacitatis, ut integros pugnos in foramina absque ulla violentia immittere liceat. *Aures* in utroque capitis latere pendulæ atque laxæ longitudine novem, & quatuor unciarum latitudine asininas repræsentant. *Labrum* superius inferiori non solum crassius est, sed etiam propendendò illud obtegit, non tamen tantæ existit molis, ut animali opus sit, inter pascendum retrogradi, ne illud dentibus inferatur. *O* magnum est, & in eà Alce, quæ spectante Gœbelio Seniore cæsa fuit, decem uncias s. pollices continebat. In parte anteriore inferioris maxillæ octo visuntur *dentes* in semicirculum dispositi, qui ita acuti sunt; ut mediantibus ipsis Alce cortices arborum commodè derodere valeat. Suprà nullos habet inferioribus antrorsum è regione oppositos: sed mox post intervallum octo digitorum in superiore & inferiore mandibula sex sunt molares duplicati, ut in bobus, ad ruminationem comparati. *Lingua* habet bovinæ similem, nimirum acuminatæ scabritiei, ad desinendum pabulum ne excidat, atque ad protegendas papillas nerveas, quæ gustûs organum, ab inclementiâ & obritu rudioris alimenti. Nec hamata tantum lingua, sed pluribus asperum præterea *palatum*, ac interna malarum capedo omnis echinata incurvis horret apicibus. De quâ oris atque palati figurâ, ut & dentium in Ruminantibus situ audiamus elegantissimam Peyerii observationem *L. o. p.* 173. his expressam verbis: "In situ hoc præcipuè notandum, maxillares dentes, magnò esse intervallò ab incisivis remotos: ubi neutrâ oris parte quicquam eminet, sed quædam observatur maxilla."

“rum coarctatio, ut buccarum operâ & linguæ illic se inter  
 “maxillas immittentium urgeatur cibus ad fauces. Quo qui-  
 “dem convenientissimo retinendi adminiculò simul providè  
 “cavetur, ne excidant boli ruminatione. Quippe advertenti  
 “animum, ac ad singula paululum attento pecoribus buccas in-  
 “ter ruminandum tantisper constringi subolet, dum fractò im-  
 “petu boli sistantur in ore.” Hæc Peyerus.

## §. VII.

Reliqua corporis dispositio hæc est : *Pectus* validum & cum *humeris* amplum sese extendit in corpus ipsum, non quidem aded longum, attamen satis robustum, quod in *caudam* admodum brevem, nec ultrà duos pollices longam definit, & versus coxas posticas ita coarctatur, ut pectoris pars antica promptius visui occurrat. Truncum, columnarum ad instar, quatuor sat longa, cervinisque altiora & robustiora sustentant *crura*, articulis atque flexuris distincta, ut Alces quietis causâ procumbere, seseque iterum absque ulla difficultate erigere queat, & illi valdè errent, qui eam standò vel arboribus se applicandò somnum capere, cum Cæsare hætenùs crediderunt: quamvis non negandum, articulationes genuum crassis atque durissimis ligamentis esse constrictas, quæ tamen eorum flexuram, uti Veteres maluerunt, non impediunt, sed efficiunt potiùs, ut non tantùm supra lubricam glaciem currens, pedibus haud elabatur, sed calcitrandò quoque insequentes canes majori ictûs vehementiâ possit repellere. *Ungulae* existunt bifidæ, ut cervorum, ipsis tamen longiores, acuminatæ & magis divisæ, quò sit, ut sese aliquantùm explanare, atque firmiter fulcimentum innitenti corporis moli præbere valeant. Totum animalis corpus plerumque *pili* regitur attrubentibus, qui versus ventrem & crura albescunt. Aliæ Alces habent maculas sub ventre, & in coxis subalbescentes; aliæ verò non: ideoque non unus ac idem color in omnibus, licet tergoribus nunquam sint discolores. *Pili* speciatim considerati digitum longi, & instar setæ porcinæ crassi sunt, in inferiori parte, quâ corio appropinquant, canescentes ut muscus arborum. Versus extremum sensim attenuati in acumen de-

desinunt, & ad basin quoque velut in manubrium coangustantur; molliores scilicet & flexibiliores hâc parte facti, ut in cutem procumberent, qui aliàs, rigidi & duri cum sint, erecti starent.

XIII

### §. VIII.

*Maribus* paulò post supercilia protuberant *CORNUA*, quæ dum tenella adhuc atque cartilaginosa sunt, molli & lanuginosa, cute ceu cortice, quæ ipsis, incrementò maximè indigentibus, pro arcendo noxio frigore inservit, tamdiù investiantur, donec ossa debitam consecuta fuerint duritiem. Ab initio, ubi enascuntur, ad tres vel quatuor digitos rotunda sunt, deinceps alæ instar ad utrùmque latus dorsum versus sese expandunt, & crassitiem interdum duorum transversorum digitorum acquirunt, mucronibus aliquot in ambitu ceu digitis extantibus. Cervinis, si ramorum spectas multitudinem, sunt minora; si verò eorum latitudinem, alcina cervinis longè præferes. Duorum enim palmorum ferè latitudinem communiter excedunt, longitudinem autem duorum pedum vix æquant. Rami cornuum pali appellari solent, qui quò sunt latiores & grandiores eò majori in pretio sunt, atque tanti fiunt, ut sint anathemata ac ornamenta splendorum palatiorum, pro candelabris multiplicibus affigendis. Nec minùs æstimium eorum adauget cuspidum numerus, sicuti Göbelius cornua Alcina 17. & 18. cuspidibus præmunita inter rarissima à se visa recenset; quibus non immeritò tanquàm adhuc rarius adjungimus, quod in Arce Electorali Regiomontanâ asservatur & viginti cuspidibus superbit. "Ampla sunt (loquor cum Göbelio) sæpènumerò, ac tantò intervallò disjuncta, ut spatium duobus conjunctim infedendi, concedant, & largiantur, quod sub Illustrissimo Principe (Prussiæ) Alberto observatum fuit, sicut etiam in Uris simile accidisse meminit Parens, ut Albertus & Guilhelmus Princeps, fratres, inter cornua Uri federint." Hoc ramosum & onerosum capitis sui ornamentum Alce quotannis mense Februario & Martio deponit; quo tempore ingentem sub cornubus sentit pruritum, hincque ea frequenter ad arbores allidit, ac

caput tamdiu atterit, donec se à molesto suo onere liberatam arbitrat. Sed nunquam otiosa Natura atque de amisso decore redintegrandò sollicita, hunc defectum mox refarcit, atque novis cornubus circa advenientem Augusti mensem Alcinum caput denuò exornat.

### §. IX.

*Fœminæ* sexus ordinariè cornubus caret, etiamsi impossibile non sit, quod etiam Actæonio ornatu capita earum possint condecorari; sicuti hoc Cervæ accidisse, ipsimet in Museo Tigurinò observavimus, ubi inter alia rariora, quibus refertissimum est, cranium Cervæ cornutę ostenditur, quæ per aliquot annos in fossâ, mœniâ istius urbis cingente, tanquam in vivario, cum multis aliis cervis fuit sustentata, & postmodum à Cl. Dn. Doct. JOH. JACOBO SCHEUCHZERO, Physicæ atque Anatomicæ Peritissimo Virò, anatomicè fuit demembrata. Cornu autem ipsum unicum est, & ex cranii parte sinistrâ ad futuræ coronalis cum osse temporis juncturam spithamæ longitudine versus posteriora profectum; ita tamen, ut in duorum transversorum digitorum altitudine undique existat politum, quod verò reliquum est, & altitudinem quatuor ejusmodi digitorum attingit, unâ cum majori crassitie rugosum ac asperrimum evadat. Atque hæc de externa Alcis facie, & configuratione partium absque sectione visui occurrentium adduxisse sufficiant.

### §. X.

De internâ ejus structurâ, atque iis, quæ adhibito cultro anatomicò in conspectum veniunt, ne vestigium quidem apud Autores invenimus, si excipias ea, quæ Parisienses, occasione Alcis fœmellæ ab ipsis dissectæ, in libro, sub titulò: *Memoires pour servir à l'Histoire des Animaux Parisiens* an. 1671. fol. reg. editò, annotârunt. Quæ licet pro Regiò tali opere exornandò, & animalis hujus in istò Regnò raritate sat brevia, manca, atque sterilia sint: intermittere tamen non potuimus, quin, cum liber hicce ob exemplarium paucitatem nonnisi in Magnatum manibus versetur, mutatis tantùm verbis ob-

ser-

servatorum seriem B. L. hic proponeremus. PARTES (inquiunt autem) INTERNÆ sive viscera (Alcis) aliquam convenientiam cum bovinis habebant, præsertim quod *quatuor* concernit *ventriculos & intestina*. Nihilominus hoc ipsis erat peculiare, quod *primus* & maximus VENTRICULUS ex parte membranæ, vasis quamplurimis conspersæ, & Epiptoi vices sustinenti, tanquam sacculo esset, inclusus; atque loco glandularum & pinguedinis, quæ ordinariè in hoc viscere visuntur, versùs supremam sui partem vesicas aëre repletas castanearum magnitudine gereret. Inter INTESTINA, quæ quadraginta octo pedum longitudinem attingebant, apparebat *Cæcum*, tredecim pollices longum, quinque verò latum, & appendice destitutum; de reliquo figurâ suâ Cæcum hominis intestinum æmulans. HEPAR parvum unius pedis longitudinem cum latitudine septem pollicum non excedebat; continuum insuper & absque lobis sine ullo vestigio fissuræ, quæ aliàs ad cartilaginem Xiphoidem conspicitur. Tàm firmiter ad hæc annatum erat Diaphragmati, ut in parte convexâ quicquam absque ejus rupturâ separare, impossibile esset. VESICULA FELLEA planè carebat, & totum usque ad interiora sui Parenchymatis lividò atque gryseò tinctum erat colore. LIEN itidem valdè erat exiguum & in sex pollicum latitudine vix octo pollicum longitudinem superabat. Substantia horum duorum viscerum maximè æqualis & homogenea videbatur: RENES verò in superficiei suâ externâ duobus diversis coloribus erant signati, qui talem asperitatem, qualem in coriò, Chagrin dictò, observamus, oculis offerebant, quamvis admotis manibus nullam scabritiem vel inæqualitatem deprehendere liceret. Lumbis non per duplicaturam Peritonæi, sed saltem mediantibus propriis vasis adhærebant. PULMO sese in septem distribuebat lobos, quorum unus in mediò cavitatis Mediastini, tres verò in utroque latere cernebantur, ita tamen ut inferiorum loborum quilibet superioribus majus expleret spatium. COR septem pollices longum & quinque latum valdè erat acuminatum vel mucronatum, & à basi usque ad apicem instructum eminentiâ, cochleæ in modum obliquè tortâ, quæ ita septo cordis respon-

responderebat, ut pro duplicaturâ partium externarum ventriculi dextri super sinistrum sit censenda. Et hæc eminentia, quæ vix in aliorum animalium cordibus dignosci potest, in hac ferâ sese insuetâ magnitudine conspiciendam præbebat. Septum & reliqua cordis, quæ dextrum ambiunt Ventriculum, crassitiem pollicis habebant. Annulli autem asperæ arteriæ erant imperfecti. CEREBRUM unâ cum CEREBELLO quatuor tantum pollicum longitudinem adæquabant, duosque pollices cum dimidio erant lata. Substantia utriusque non erat diversa, sed ubique nivæ albedinis, satisque compacta, non obstante putredine incipiente; quæ indicabant, ea integræ existere sanitatis in hoc Animali, quod aliàs morbis istis, quorum sedes est in Cerebro, obnoxium perhibetur, cujusque cerebrum juxta Cardanum frigidius, humidius, & magis pituitâ repletum est, quàm omnium cæterorum Animalium. GLANDULA PINEALIS erat singularis magnitudinis, nimirum tres lineas longa, similis isti, quam in Dromedario invenimus, (avellanæ minori magnitudinem responderebat, ex glandulis tribus, foveam in medio relinquentibus, composita) exceptâ ejus figurâ, quæ in Alce ordinariè conica est, in Dromedario autem trifolii formam exhibebat. APOPHYSIUM MAMMILLARIUM, quæ pro odoratûs organo vulgò habentur, diametere in hoc animali quatuor erat linearum, & ita hi Processus majores, quàm in aliis animalibus, quæ hætenus cultro anatomico subjecimus. GLANDULA LACHRYMALIS habebat longitudinem unius pollicis cum dimidio, & latitudinem septem linearum. Circa labrum superius duo magni atque robusti erant muscoli, ad sustinendum prominens labium destinati. Hætenus Parisienses.

## §, XI.

Natalem Alcis nostræ locum unanimi consensu tam Veteres, quàm Recentiores Zoographi constituunt Plagam Septentrionalem. Hæc verò cum quamplurimas sub suo ambitu contineat regiones, non è re erit, eas specialiter percurrere.



currere. Olaus Magnus, ut à longissimè distitis incipiamus, Alcen extimis Regni Sueciæ terminis assignat, quando *Hist. Sept. lib. XV III. c. 1.* ait, *Alces sunt ab Aquilone, ubi vulgariet Elg vel Elgar appellantur; à quò Cardanus etiam non multum ab- ludit, lib. 10. Subtilit. sub Boreali polo animal cervo simile, carneam habens promiscuam (quæ de Alce sunt intelligenda) nasci, af- firmans. De Lapponia inquit Schefferus Hist. Lapponia c. 29. Alces parvò numerò Lapponia nutrit, magis aliunde accipit, præcipuè ex Lithuanîâ; & aliò locò ex Olao Petri de Alce recitat, Alces in Lap- landiâ australi duntaxat parte versari; & ex Carelia (Ducatu Alba Rusiæ s. Moscoviæ) bi in anno in maximâ copiâ per fluvium Nivæ transire, dum Vere catervatim in Careliam tendunt, & Autumnò tur- sus remeant in Rusiam. Aliæ & Polonia Alces, & in Sueciâ haud parvo inveniuntur numerò: Nullibi tamen frequen- tiùs quàm in Ducatu Borussîæ occurrunt, ubi non solùm ab animalibus rapacibus, quæ eas in vastissimis aliarum regio- num desertis invadunt, & hominum nimiis insidiis, ob re- strictam venandi licentiam, existunt securæ; sed etiam hy- berno tempore, tanquam sub temperatiore climate, sufficiens reperitur pabulum, quod alibi summa frigoris inclementia deperdit, ut hinc non immeritò Borussiam Alcis patriam nominaverimus, Meminit quoque Lucas de Linda in descri- ptione Orbis Libro XII. p. 1117. de Moribus ferorum ho- minum in nova Frantzia, & ibi Alces generari, dum ex Au- tore quodam ignoto, Escabor dicto, sequentia refert: "Qui, circa Quebecus degunt, à mense Septembri in Octobrem us- que mensem, piscationibus anguillarum, se pro more recepto, exercent. Has anguillas in usum hyemis duratas servant. Anguillis consumptis, Alces aliasve venantur feras, in qua- rum penuriâ aliquot dierum jejuni famelici esset solent." An- verò cum Alce nostra conveniant, ex solo nomine absque aliis circumstantiis & descriptionibus, ab Autore omis- si, ha- riolari non licet.*

## S. XII.

Amat Alces umbrosa & uliginosa loca, quercubus at- que fagis obsita, tam voluptatis, quàm saporis ipsi & copio- se il-

sè illuc provenientis nutrimenti gratiâ. Carpit enim herbas virides, & delectatur corticibus arborum: ac ingesta post primam coctionem, uti boves ac cervi, ruminat. Decerpit gramen procedens, non retrocedens, ut falsa erat antiquorum opinio, ope dentium anteriorum inferioris maxillæ, quam inter edendum bovis ad instar hinc inde movet, & linguæ. A graminibus pervenit ad arbores; earum cortices ab imò sursum capræ instar abradens. Arbores sublimiores, quasque faucibus attingere nequit, gutture comprimit, paulatimque ad terram declinat, aut adaptato collò descehit, donec pede cacumina earumprehendat; quæ tantisper retinet, quoad se foliis exsaturavit, postmodum ea remittit ac resiliire patitur. Arbores autem, quarum corticibus vel potius muscis illis adnascantibus quàm maximè vescitur, ex plurimorum observationibus sunt *Alnus*, *Betula*, & *Populus Lybica*, seu *Tremula* ob foliorum tenuissimis pediculis appensorum continuum motum dicta. Ad *Salices*, quarum variae numerantur species, quandoque vicissitudinis ergo procedit. E Graminum amplissimâ classe præprimis sibi eligit *Gramen Dactylon esculentum*, Germanis Mann-grass vel Schwaden nuncupatum, de quo Casp. Bauhinus in *Theatr. Botanic. lib. I. p. 119.* ita: “Gramen hoc radice est fibroso, candidâ, in transversum porrectâ, ex qua culmi cubitales & nonnunquam altiores, crebrò geniculati, per maturitatem subrubentes, assurgunt: circa quos folia oblonga, Gramini similia, prioribus latiora, viridia, & ea parte, quâ culmos ambiunt, villosa: paniculâ est viridi, per maturitatem nigricante, quæ in plures, septem, octo, & novem veluti spicas longas, sæpè uncias sex superantes, & pertenues, dividitur: semen, ab una tantum parte utriculis inclusum, oblongum, compressum, Miliò Panicòque minus, quod à glutinis ac utriculis repurgatum candidum est, Oryzæ ferè modo.”

### §. XIII.

Silentii involucrò minimè hîc obtegi meretur singularis iste, quem in Alimentorum sibi proficuum comparatione



ratione Alce adhibet, delectus. Etenim, postquam sese foliis graminum atque herbarum, in paludosis & humidis istis locis, quæ Alces securitatis causa frequentat, ubertim provenientium saturavit, statim se convertit ad arbores, & vel earum cortices, vel iis inhærentes muscos, quales sunt Muscus capillaceus longissimus, Usnea officinarum, & Muscus crustæ modo arboribus adnascens C. B. utpote naturâ siccissimos, devorat: atque ita, humida siccis combinandò, præternaturalem liquorum tum fluiditatem tum consistentiam avertit, salutique suæ ex innato Naturæ instinctu quàm optimè prospicit. Singularem itidem hujus animalis astutiam arguit, si vera sunt, quæ Olaus Wormius l. c. de ipso narrat, quod si nempe hyemali tempore, & terrâ nivibus testâ, plures Alces simul ambulent, ita progrediantur, ut una præcedat, reliquæ sequantur, eadem legentes vestigia, ita, ut unius saltem vestigia quis se videre existimet, nec numerus earum ex vestigiis cognosci valeat; quicquid etiam regeret Göbelius d. l. velut evidens simplicitatis imò stoliditatis signum proferens, quod viderit pullum ante foramen fornacis stantem tamdiu ignis calorem excipere, usque dum ab igne ambustus exspiraverit; præsertim cum sibi ipsi eodem in loco contradicat, quando Alcem tanquam animal providum & fallax persecutores suos ita circumducere & illudere confiteretur, ut à venatione stomachantes desistere cogantur. Neque pro certissimo timiditatis (cum plerisque Autoribus Veteribus) indicio accipiendum est, quod ut plurimum gregatim, raro solitaria ad pascua procedat, & canibus insequentibus calcanea non cornua objiciat, sed salutem in fugâ quærat: cum potius heroicum existimandum, quod canes, hostes suos inferiores, contemnendo calcibus evincat, non ramosis cornubus, quæ ad necessariam sui defensionem contra superiores hostes, ut sunt Homines, Ursi, Lupi, reservare videtur. Inest ipsi præterea æquè ac Cervis mira natandi pericia, ut sæpe numero maxima flumina atque latissimos lacus tranet: summaque gaudet velocitate, quam & longa crura & metus instantis venatoris adhuc accelerat; quâ fit, ut incredibili pernicitate, levissimoque gressu uvida loca (quæ Morassa vocant)

transiliat, & venatores, canes ac lupos insensissimos longo post se relinquat intervallo. Quod ex conspecto proprio sanguine moriatur, & Morbo comitiali valdè sit obnoxium, ab eoque non liberetur, nisi altera pedum posteriorum ungula auri fuerit apposita, Recentiorum eloquio, fabulam sapiunt. Integræ potiùs & incorruptæ est sanitatis, atque incredibili pollet robore, præprimis pedum posteriorum, quibus lupum aut robustissimum canem unico ictu interimit, imò interdum elabente cane vel homine arborem elidit, ac si fungus adfuisset.

#### §. XIV.

Cæterum mansuetum & innoxium existit animal, neque mini damnum inferens, si modo ab aliorum invasionibus esset liberum. Pro fœmina more Cervorum non dimicat, neque prælia instituit, sed quodlibet suam adjunctam habet sociam, cum quâ sub finem Augusti coit, eamque imprægnat. Eo tempore clamorem cervino similem emittit, & in furorem quasi à nimio Veneris appetitu redactum, prioribus pedibus terram frequentissimè concutit, illisque contra quemcunque hostilem insultum summa cum agilitate utitur, ut illud tunc aggredi summè sit periculosum. Fœmella fœcundata permanet usque ad finem Maji, tunc verò prolem unicam vel binam, rard ternam, excludit: quia vacca non plures quàm duos vitulos simul nutrire potest, cum singulis ubera bina, quæ vacca habet quaterna, debeantur. Matrem sequuntur vituli annos duos vel tres, quam tanto amore amplecti Gōbelius l. c. asserit, ut eâ trajectâ globulo bombardæ atque corruente, fixis pedibus consistent, donec ipsi transfixi simul concidant. Fugâ enim vitam non redimunt, sed ut vivi à lateribus matrêm non discedunt; sic quoque mortuas deferere nolunt. Hoc certum est, quod mater hominem advertens vocem edat, quâ auditâ pulli se unâ cum matre fugæ committunt, aut, si ob virium defectum non possunt, humi procumbunt, terræque, ne à persecutore suo videantur, se firmiter applicant.

## §. XV.

Pulli, quos cicurare animus est, ante decimum quartum ætatis diem in sylvis vel capiuntur, vel cum matre ad aquas, quas tranare cupiunt, coguntur, quod eo facilius illinc, tanquam natandi peritiâ adhuc destituti, manibus excipi queant. Postea admoventur uberibus vaccarum domesticarum, quæ eos libenter admittunt, & prout suos vitulos enutrient. Nam hoc pacto ope vaccarum, in continuâ hominum frequentia versantium, mansuescunt, suamque feram indolem exuunt, sicuti Wigandus in *suâ Alci historia* meminit, habuisse Præfectum quendam Alcen assuefactam, quæ quotidie ex prædio cum armentis in sylvas vicinas exierit pastum, & sub vespere cum iis domum redierit. Cicurati pulli pane vescuntur ex manibus hominum, aliâs comedunt avenam, scenum atque brassicam, veluti cætera animalia domestica; & in Borussia, ut mihi amicorum quidam retulit, vituli alcini tenui sceno atque avenâ, intermixto fructu, quem Misteln vocitant, & hyemali tempore apicibus Filiarum inibi copiosè innascitur: omnibus minutissimè incisis, & aquæ inspersis farciuntur. Scire desideras, B. L. quisnam sit iste fructus Misteln dictus? en in promptu est Botanicorum Coryphæus Casparus Bauhinus, qui tibi responderet, esse Viscum baccis albis, à Fuchsio *Hist. Plantar. p. m. 328.* "tanquam planta,, fruticosa, lenta, semper virens, intus porracei coloris, extra,, subflava, folijs buxi, acinis exiguis, sine flore, descriptum,, additâque iconè exhibitum."

## §. XVI.

In patentibus sylvis haud conspicitur Alce nostra, nec latos ingreditur campos, quod imminens vitæ suæ discrimen declinet, præcia, sibi cum ab hominibus, cum aliis feris frequentes insidias strui; sed in densissimis sylvis latibula sua quærit, & maximè horrendas solitudines tutissima sibi & jucundissima putat domicilia. At & illic secura haud permanet, sed variis venatorum machinis atque instrumentis continuè ferme urgetur. Antiquissimum Alces vel extensis telis vel positis cuspidibus nocturno tempore excipiendi modum nos

Olaus Magn. l.c. docet. Nec minùs obsoleta videtur Alces capiendi ratio, quæ hominibus istis, quibus liberum non est prædatum aut venatum exire, usitata est, & à Göbelio sic commemoratur: Lithuani nostri, qui in sylvis insidiosi hanc feram prosequuntur, scientes, quibus escis Alces delectentur, illi magnâ vi & communi auxilio arbores prociores, ubi Alces transitum habere solent, contorquent ac deflectunt, ut resiliere possint, funiculis adaptatis, ita ut cervicibus hæreant. Eum igitur locum quando Alce pabuli gratia accedit, atque nescia doli tangit decipulum seu *мышел*, guttur includitur, ac resiliente arbore Alce suffocatur. Magis hodie usitatum est, quod vel fossis inopinatè intrudantur, aut canum ope retibus impellantur, vel etiam globulis plumbeis bombardâ emisissis trajiciantur. Notandum autem circa ultimum modum venit, quod Venatori hanc Feram bombardâ appetenti ventum adversum observare necessum sit, quia alias venatorem ob acutissimum olfactûs sensum è longinquo odorans retrogreditur. Si ictu percussa non corrui, venatorem rectâ adoritur, & vindictæ cupida eum qui læsit vel cornibus extollere, vel pedibus conculcare atque conterere allaborat, uti hoc quampluribus, si opus foret, funestis exemplis posset declarari; quare pro avertenda à se bestia irruente sese post arborem occultet venator, aut celerissimo equorum cursu se ingruenti vitæ periculo eripiat.

#### §. XVII.

Sufficeret commodo atque pacifico huic animali, homines sustinere venatores, telis, sagittis, millenisque lethiferis armis illud in vasta solitudine impetentes, si non adhæc insidiosis infestaretur lupis. Hi enim hyeme asperrimâ fame pressi eremi latebras vasto agmine circumeuntes Alcibus horrifono suo ululatu terrorem incutiunt, easque in certamen provocant: quod Alces nec recusant, sed naturæ instinctu hostes suos in lubricam & crystallino nitore fulgentem glaciem, ubi mucronatis suis ungulis firmum figere possunt pedem, lupi verò ungulas suas, viribus vacuatas, in vaginis retinent, tanquam idoneum pro sui defensione campum deducunt, eosque illic ungulis & cornibus interimunt, vel effugant. Cum  
lupi

lupi procul dubio super congelatas nivium congeries, quibus Alces ob nimiam corporis molem immergerentur, tanquam leviter insultantes exciperent victoriam, victoresque prædam partirentur.

### §. XVIII.

UIS UIS hujus animalis tam vivi quam mortui multifarius est, nullaque fermè pars in toto ejus corpore invenitur, quæ ob singularem, quam generi humano præstat, utilitatem, singularem non mereatur laudem. Dum enim in vivis est, Alces cicurata rei vectoriæ assuescieri potest, quemadmodum hoc Olaus Magnus exemplo populorum Borealium comprobatur, cum *l. XI. cap. 29.* de istis sic loquitur: Onagrorum *f. Al-*, cium vehementissimus etiam cursus in nivosa glacie est apud „ Sueones Septentrionales, maximè ultra Regiam Holmensem „ versus superiores partes Aquilonis. Inferius verò ad plagam „ Meridionalem, etsi in magna multitudine vastorum nemo- „ rum sint, ob Regium tamen edictum in usu non habentur, „ ne scilicet eorum currendi celeritate (quæ longè superat o- „ mnium equorum velocitatem) proditores utantur, ad secreta „ Regni inimicis quàm ocysimè revelanda: vel etiam (ut ex relatione aliorum accepimus) ne homicidis pro fugâ, ad evitandum justum criminis sui judicium, & insequentem pœnam declinandam, accelerandâ inserviat. Famis enim ac sitis, „ laborisque patientissima est hæc bestia, ut per diem noctem- „ quæ immensa spatia ducentorum milliârium Italicorum cur- „ rendo valeat perficere, privata cibo. „

### §. XIX.

Dum mortua, *Carnem* suam ad menses Magnatùm & Nobilium, eorumque, quibus venandi licentia in istis oris concessa est, mittit, quæ tamen in pullis delicatior, quàm in adultioribus, utpote quarum caro magis fibrosa & sicca est, ideoque maximâ butyri copiâ inter assandum opus habet. Os amplum, & imprimis labia crassa atque mollia delicatulis in fercula cedunt. *Pellis* crassitie suâ valdè insignis materiam thoracis egregii suppeditat, cum ab alutariis piscium adipe, ad hunc usum alumini præferendo, præparata non modo gran-

grandines ac imbres arceat, verum etiam vehementes ictus ferri, casum punctumque factos, facile sine detrimento corporis, quod tegit, excipiat. Unde fit, ut moderno tempore milites primarii tam in Septentrionalibus, quam aliis regionibus, maximo pretio sibi hujusmodi præparatos thoraces coemant, & ferreorum instar hodiernum expetant. A cervina pelle, cui haud absimilis est, inspirata discernitur. Nam, licet densissima sit, transmittit tamen aërem ex ore spirantis afflatum, & acuto straminis culmo facili negotio perfodi potest; quod in cervina non æquè procedit. Conficiuntur quoque ex illa balthei, cinguli, chirothecæ atque caligæ, quæ ob molliorem crassitie conjunctam non solum commoda sunt, sed etiam interitum planè nesciunt, ut ad Nepotes, & qui ab illis aluntur, transmitti queant, nisi vi aliquâ sponte ea disruperis. Cutem qui obtegunt *pilis* utuntur ephippiopœi atque lorarii ad ephippia, culcitras atque pulvinaria explenda. E *cornubus* artificum industriâ emollitis parantur capuli ac manubria cultrorum & gladiatorum, præsertim venatoriorum, quos *Hirsch* sanger appellant: & *ossa tibia* indurata, ob rectitudinem & longitudinem suam singularem, tornatoribus inferviunt, ad utensilia gallico nomine notissima Geridons, & hujus generis quamplura alia, item pocula pro exornandis conviviiis exinde formanda. *Ungula* alcis nigro colore tinctæ usum promunt exiguum in subministrandis armillis & torquibus Virginum, qui auro, plurimum tamen margaritis insertis, ornamenti haud vulgaris loco ab iis gestantur.

## S. XX.

Sed prædictis usibus adhuc major est Medicinalis, cum tota Alces medicamentosa existat, & sibi Sacra Medicina optimò jure hoc animal ob haud satis extollendas ejus virtutes quantum quantum est vendicat. Tot enim ad sanitatem, nobilissimum vitæ humanæ cimelium, tam conservandam, quam restaurandam suppeditat remedia, ut meritò habeat, cur sibi gratuletur, qui ejus sibi paravit notitiam. Ades dum igitur mens humana, & mecum collige thesauros, quos summus rerum Conditor in hoc animali recondidit, & noli amplius



plius Alcen ex sola nominis famâ, sed ex virtutum ipsi inditarum præstantiâ æstimare. Ne verò in enarrandis iis absque ordine procedamus, in tam amplissima divitiarum ferie agmen ducant CORNUA, ramosa illa capitum Alcinarum ornamenta, utpote quæ non solum plurima, sed etiam reliquis nobilitate antecellentia pharmaca porrigunt. Ex his autem cornubus ea, quæ in usum medicum trahuntur, non uno eodemque ab omnibus omnia colliguntur tempore, sed alii commendant illa, quæ Alces mense Februario vel Martio sponte dejecit; Alii verò his præferunt ista, quæ ab animali sub finem Augusti in furorem quasi venereum rapto atque mactato vi decerpuntur; quò scilicet tempore calidum, vegetum & succulentum magis, Veneris stimulo agitarum, spiritum genitalem cum Sale vol. in universum quasi corpus, & præcipuè cornua diffundat: & quidem ducti ratione Botanicorum, qui radices vel plantas in usum pharmaceuticum vocandas Veris potissimum tempore conquirunt, rati, plantas tunc planè succulentas esse, ac, ut ita dicam, utero geri, nec dum ipsarum vigorem in flores, folia, caules aut fructus abiisse. Quibus tamen idcirco non subscribimus, quin potius priorum sententiæ calculum nostrum addimus, judicantes, idem cornubus Alcinis accidere, quod aliis fructibus, qui nunquam efficaciores existunt, quàm cum debirum maturitatis tempus adepti sponte deciderint. Maturitatis autem notæ certissimæ habentur, si cornua sint ponderosa, compacta, dura, & albicantia; cum contrà ista, quæ injusto tempore & vi ab Alcibus desumuntur, aliis leviora, porosa, & in medio lituras & sanguinis vestigia exhibere, deprehendantur.

### S. XXI.

Exhibent quamplurimi Cornu Alcis *crudum* sine ulla prægressa præparatione, persvasi, vires in eo tunc concentratas & coadunatas majore vi in corpus humanum agere posse, quàm cum adhibito igne subtiliores ejus particule expellantur ac dissipentur. Ideoque limâ vel aliò instrumento aspero in pulverem subtilissimum redigunt, eumque vel solum vel aliis appropriatis sociatum v. g. in Epilepsia, Vertigine,

gine, Convulsionibus cum aqua Lavendulæ, Majoranæ: in Febribus cum aqua Carduibened. & Cent. min. aut contra Sputum sanguinis, & pro Hæmorrhagiis quibuscunque compescendis cum Göbelio, additò Extractò Tormentill. & Sanguisorb. & simil. propinant. Sed improbant hunc modum alii, experientiâ confirmati, Alcinum cornu pariter ac Cervinum frequenter eadem ratione, uti fuit exhibitum, ob insufficientem ventriculi calorem, tam duram substantiam in sua principia resolvere incapacem, per alvum sine ulla alteratione fuisse ejectum. Spirituosa enim substantia omnis actionis causa per terrestres cornuum particulas colligata impeditur, quò minùs virtutes suas exercere valeat, sed quasi sepulta jacet: imo sal balsamicum vires suas exferere nequit, nisi à terrestribus suis vinculis priùs fuerit liberatum.

#### §. XXII.

Hinc & quò melius Naturæ nostræ consulant, Cornuque Alcinum nativo corporis calori obsequiosum reddant, Ignem, tanquam universale instrumentum Chymicum, ideoque à Tackenio Chemiæ Professore publicum appellatum, in auxilium vocant, & mediante ipso, adhibitâ simul artificiosâ manu, diligentique circumspectiōe, egregia medicamenta præparant: quæ nos pro diverso ignis gradu in duas Classes ita dividemus, ut prior contineat ea, quæ igne tantum leni, solâve coctione ex cornu eliciuntur; posterior vero illa comprehendat, quæ aperto & vehementissimo Igne ex isto proveniunt.

#### §. XXIII.

Sit itaque in primâ Classe I, Decoctum Cornu Alcis, quod impetratur si *℞. Raf. Corn. Alc. q. v. & cum f. q. aquæ simpl. coqu. in diplomate seu vase duplici, sibi invicem adaptatò, atque optimè clausò, ne inter coquendum vis medicamentosa avolet. Et post sufficientem cocturam habebis liquorem, viribus medicamentosis imprægnatum. Operationis hujus *Ætiologia* nobis aliqua consideranda offert: etenim I, præcipitur coctio per diploma, quæ nihil aliud est, quàm phar-*



pharmacum decoquendum in vase æneo vel figulino conten-  
tum unâ cum vase lebeti magno , aquâ fervidâ repleto, vel  
M. B. imponere. Hoc enim pacto avertitur , ne ignis aliâs  
apertus nimis in medicamentum agat , & violentiâ suâ dis-  
turbet vires eorum quæ decoquuntur ; sed particulæ quæsi-  
tæ per blandum aquæ calidæ fomentum , & pro extrahendis  
viribus sufficiens, successivè quasi exprimantur. II. Pro men-  
struo assumitur aqua simpl. huic usui præ vino & aliis spiri-  
tuosis apprimè conveniens, quò mucilaginosæ & aquosæ cor-  
num particulæ ob indolis similitudinem aquæ vires suas  
communicare , seseque invicem meliùs commiscere valeant.  
III. Requiritur diuturna coctio, ut particulæ viscosæ & glu-  
tinosæ , quæ in ossibus magis compactæ & firmiter inter se  
intricatæ sunt, prorsus disgregentur. Ideoque IV. cum per  
longam coctionem aquæ particulæ quamplurimæ exhalent,  
exigitur sufficiens liquoris copia , quæ juxta Autorum phar-  
maceuticorum calculum in aquæ decupla quantitate & ultra  
consisteret. *Ufus* hujus liquoris est, ut vel dicto modo præ-  
paratus solus vel cum aliis exaltatus, aut pro obtinendo sua-  
vi odore & sapore appropriatis junctus, in Febribus, Variolis,  
Morbillis etc. ægrotantibus dari queat: Vel in Gelatinam s.  
Galredam redigatur, *℞.* Brodii decoctionis, filtrati & affusâ  
aquâ renovati part. ij. sacchari albiss. p. j. & supra lenem i-  
gnem ad consistentiam crassam inspissandò, quæ postmodum,  
si lubet, in scatulas vel formas sculptiles effundatur, & conge-  
lata usui asservetur. Instituitur hic nova coctio , & subse-  
quens inspissatio, ut 1. particulæ aquosæ mucilaginosæ atque  
nutritivæ cornuum intermixtæ tanquam inutiles separen-  
tur, & succus hic sale vol. turgidus magis congregetur, ac in  
unam massam compingatur: 2. ut ope coctionis particulæ  
salinæ sacchari, tam saporis suavioris, quàm debitæ consi-  
stentiæ acquirendæ gratiâ additi, cum particulis glutinosis  
cornuum aptius socientur, & unicum corpus quasi constitue-  
re possint. Propinare autem hanc Gelatinam licet vel sim-  
plicem, in aquâ, cerevisiâ, aut Iulepis solutam , vel ad nor-  
mam Gelatinæ C. C. aceto destill. eam irrorare, succo Citri  
acidulari, speciebus fragrantibus aromatizare, aut addito suc-

cò Berberum ipsi rubineum colorem ad libitum conciliare, & pro instituti ratione, Medicique prudentis judicio unà cum aliis medicamentis petentibus tutò porrigere. Fit quoque ex ipsa Gelatina egregia Essentia sive Extractum cum Spiritu Juniperi per fermentationem è baccis parato, cui si addatur sal proprium vol. Cornu Alcis, prodit Essentia elegans Alexipharmaca,

#### S. XXIV.

Secundum inter præparata primæ Classis locum obtineat Cornu Alcinum Philosophicè sive sine Igne, per Calcinationem philosophicam vel vaporosam dictam, ad differentiam calcinationis vulgaris, quæ apertò procedit Igne, ad modum C. C. præparatum. *℞.* Cornuum Alcinorum apices quot libuerit, suspendantur in collo vesicæ, ut vapor aquæ, ex quâcunque velis herbâ, destillandæ (nisi pro obtinendo odore fragranti flores Rosarum), vel alias herbas benè olentes selegeris) assurgens eos lambere possit. Relinquantur autem ibidem tamdiu, donec albescere incipiant, & cultro derasi extimum nigricantem corticem, atque medullam intimam promptè deponant: postea blandè exsiccantur & in pulverem conterantur, vel sub præparatorum formâ asserventur. Alii, quibus hæc calcinatio vaporosa ob longum, quod requirit, temporis spatium, nimirum ultra triduum durans, displicet, pro faciliiori & celeriori scopi sui exsecutione *℞.* Cornuum Alcinorum frustra ferrâ dissecta q. v. ingerunt ahenò vel ollæ majori & affusâ aquâ, sale quopiam alcoholisato pro emollienda exteriori nigredine imbutâ, sufficienter per sex circiter horas aut ultra coquunt, usque dum nigricans cortex deglubi, & medullaris substantia cultro erui possit. Ipsa vero reliqua substantia albida, masticabilis & friabilis denuò ad eluendam falsedinem in aquâ limpidissimâ coquatur atque exsiccetur, aut si rubro colore tinctam desideras, cum aqua flor. Tiliæ iterum ebulliat, rursusque exsiccetur & servetur. Quicquid sit! & vel priori vel posteriori modo conficiatur, manet interim usus hujusmodi Cornu Alcini philosoph. præparat: multiplici experientiâ certus.

Tam-

Tamet si enim inficias ire haud liceat, illud præter gelatinosam viscositatem multum de sale vol. deperdere, virtus tamen diaphoretica, præcipitans, absorbens, anodyna, antifebrilis adhuc restat, unde in Variolis, Morbillis, Febribus malignis, Epilepsia, Torminibus infantum, & Lumbricis fugandis non minimum meretur encomium.

### §. XXV.

Subnectimus Cornu Alcino Philosoph. calcinato ob operationis affinitatem Tertium primæ Classis præparatum, quod est Aqua è typhis Alcinis, facili negotio acquirenda: Nimirum ꝛ Novella Cornua sanguine adhuc succulenta, inciduntur in frustula & retortæ indita per Baln. Mariæ aut Baln. Vaporis vel per se, vel cum parva vini generosi quantitate tamdiu destillantur, donec nulla liquoris guttula amplius exsudare observetur. Aquæ huic stillatitiæ sale vol. succoque nutritiò gravidæ ingens ut plurimum tribuitur efficacia in expellendis Variolis & Morbillis, atque sistendâ cordis Palpitatione, vel sola vel vehiculi locò cum cæteris medicamentis alexipharmacis in morbis malignis ac pestilentialibus usurpata.

### §. XXVI.

Confici adhuc ex Cornubus Alcinis licet Magisterium, si vel juxta præscriptum Augustanorum ꝛ. Limaturæ seu scobis Corn. Alc. q.v. irrigas cum Spiritu. Nitr. postmodum superfundis acetum vini optimè destillatum, ponis per aliquot dies in digestionem, dein filtras per chartam emporeticam, & instillatò Oleo Tart. tanquam alcali acido Spiritûs Nitri contrariò pulverem ad fundum præcipitas, frequentioribus ablutionibus edulcorandum: vel si ad mentem Ludovici Rasur. Corn. Alc. mundi & tornò ab extremo cortice & medullâ separati v. gr. ʒj. aflundatur f. q. Spirit. Nitri, ut fiat solutio, quæ ad medietatem liquoris iterum abstrahatur, & quod reliquum est Aquâ simplici tam edulcorandi, quàm Magisterium ad fundum præcipitandi gratiâ diluatur. Hac enim methodo medicamentum evadit elegans, pulveribus cordialibus & confortantibus admiscendum, atquæ, cum in potu vel aliis

liquidis facillè diffuat, pro decipiendis infantibus, pharmaco-  
rum assumptionem recusantibus, satis commodum.

### §. XXVII.

In alterâ & posteriori præparatorum Classe nobis obve-  
niant Spiritus, Sal vol. & Oleum Corn. Alc. quæ simul eâ-  
dem operatione impetrantur, si nempe ꝙ. Cornuum Alcono-  
rum ope serræ in frustra mediocria dissectorum (non raspu-  
ræ, ne ex nimis discontinuato corpore principia destillabilia  
impetuosius prorumpant) v.g. ꝑ. ij. vel iij. & injiciantur Re-  
tortæ vitreæ pro sustinendo Igne vehementissimo benè lori-  
catæ, aut terreæ bonæ notæ, furno destillatorio decenter  
committendæ. Huic applicetur recipiens capacissimum, quò  
Salis & Spiritus particulæ volatiles prosilientes inveniant  
sufficiens sese expandendi spatium, & rupturæ periculum  
declinetur; intercedente recipientis collò vitreò cum retorta  
firmandum, & juncturis singulis probè clausis sibi intimè ad-  
aptandum. Posthæc Retortæ immediatè admoveatur ignis  
carbonum primò mediocris, ut lenissimo carbonum accen-  
sorum calore cornua incalescant & sudorem suum phleg-  
maticum emittere cogantur. Hinc tamdiu eodè Ignis  
gradu insistendum, donec, phlegmate omni exceptò, spiri-  
tuosa effluvia nares ferire incipiant. Quibus perceptis Ignis  
gradus semper sensim sensimque augeatur, quoad ipse Spi-  
ritus subtilior sub nebulæ crassioris facie sese diffuderit, &  
post eum Sal volatile tam in collò, quàm totius Recipien-  
tis concavitate, instar ramulorum Corn. Alc. aut vernan-  
tium stirpium hinc indè lætè divaricatorum, jucundissimo  
cum spectantium oblectamento sese manifestarit, tandemque  
Oleum spissum atque fœridum, lentè propullulans, penitus  
fuerit protrusum. Absolutâ hoc modo destillatione colligatur  
statim, si libuerit, seorsim Sal. vol. & Oleum per separatorium  
aut filterum chartaceum Aquâ humectatum à Spiritu segre-  
getur: cuncta cum majoris efficaciz, tum puritatis & nitoris  
acquirendi causâ adhuc ulteriori destillationi submittenda.

### §. XXVIII.

Pervenimus autem ad *Subtilisationem* tam Spiritus quàm  
Sali

*Salis vol.* Cornu Alcini duplici viâ, dum vel utrumque seorsim, vel ambo junctim rectificationi subijcere possumus. Si enim *Spiritus solus* desideretur, adjectis ille cineribus clavellatis in Retorta cum alembico purificetur, aut saltem per chartam bibulam duplicatam trajiciatur, qui sese rubineo commendabit colore. Si *Sal purissimum* exoptas, conjice illud prius in Spiritum Vini phlegmaticum, & inibi aliquamdiu ad solutionem relinque, dein immitte phiolæ vel cucurbitæ altiori, angustò collò, ac minori orificiò præditæ, atque adaptatò alembicò rostratò destillationem ex arenæ lenissimo Igne institue. Sic videbis per longitudinem colli cucurbitæ vel phiolæ particulas salinas volatiles ascendere, seseque per angustum orificium in alembici capitello concentrare, relictis in fundo phlegmate & oleo, quæ ob lenissimum Ignis gradum istam altitudinem tam facile & citò attingere nequeunt. Si verò *Ambo* unâ destillatione simul exaltare mavis, Spiritum ab oleo separatum Sali vol. in phiola l. cucurbita longioris colli contento, affunde, & impositò alembicò destillationem inchoa lenissimo Igne, qui sensim augmentum capiat, ut Sal. vol. nivis instar in alembici capitellum sublevetur. Et tunc vel remotò alembicò, ne à Spiritu subsequente, & admodò sine ulla mora aliò idoneò alembicò, excipiendò solvatur, illud subito collige; vel pro obtinendo Spiritu Cornu Alcis Essentificato Sal unâ cum Spiritu in excipulum propelle, hancque destillationem tamdiu urgere perge, usque dum exstillantis Spiritus guttulæ manu exceptæ salinâ acrimoniam atque volatilitate orbatæ phlegmaticum saporem habere dignoscantur. Sal, quod remotò alembicò exemisti, similiter denuò in Spiritum Vini phlegmaticum solve, repetendæque sublimationi destillatoriæ expone. Ita enim album nitidumque permanebit ac præcavebitur, ne aliquamdiu aservatum nigerrimum induat colorem, quod aliàs evenire solet, cum oleosæ particulæ, per vehementiorem Ignem adustæ à Sale minus separatæ, sed sub ejusdem nitore primùm delitescentes, cum tempore ad exteriorem superficiem conspiciam à Salis activitate quasi solutæ extravertantur. Et hæc est ratio, cur nonnulli pro earundem particularum oleosarum se-

sequestratione jubeant Sal. vol. æquè ac Spiritum cum cornu Alcis usto, vel cineribus clavellatis aut calce viva permiscere, & dein sublimationem perficere, utpote sub qua solæ particulæ volatiles sublimia petunt, dum interea oleosæ ab admixtis terrestribus quasi absorptæ, in fundo detinentur.

### §. XXIX.

Receptissimus Salia hujusmodi volatilia *conservandi* modus est, ea vitris vesicâ, & epistomiâ ceræ, vel, quod omnium optimum est, vitreâ exactè politâ benè munitis includere; sed cum & hac ratione vix coerceri queant, quod minùs in auras avolent, ingeniosa hominum mens de excogitandis debitis vinculis, quæ servis hisce fugitivis adjicerent, semper fuit sollicita. Hinc alii v. g. Sal. vol. C. C. Spiritui C. C. rectificato injiciunt, sicque Spiritum nexu stabili cum Sale conjungentes essentificatum reddunt. Alii Salis hujusmodi volat: q. v. immittunt cucurbitulæ vitreæ, instillando huic aliquot guttulas Spiritûs Vitrioli, Salis, aliufve mineralis acidi, ut exoriatur effervescencia; sub qua Spiritus talissimodi mineralis acidi particulæ poros Salis vol: intrant, & cum sint fixæ, Sal aliàs fugacissimum quasi ligant, ac pondere suo detinent. Quâ cessante ad dilutionem aquæ fontanæ tantillum affundunt, & post peractam filtrationem super arenam exhalante humiditate superflua Sal in crystallos concrefcere sinunt fixatas: quas si iterum volatilifare cupiunt, Sali huic fixato admiscent Salis Tartari vel Salis Absinthii duplum vel triplum, terentes ambo, ut non solum exactè copulentur, sed etiam simul Sal hoc alcoholifatum Sal acidum, in cujus compedibus Sal vol: detinebatur, arripiat, & illud omnimodè liberum faciat. Mixturam hanc indunt cucurbitæ, eamque unâ cum affuso Spiritu Vini impositò alembicò leni Igne tamdiu torquent, donec se Sal vol. alijs quasi à Spiritu Vini acceptis, in capitelli summitate rursus listat.

### §. XXX.

Huc etiam pertinet brevior & noviter à Cl. Waldschmidtio, Kiloniens. Prof. Meritis, in *peculiari dissertatione de Salis vol. C. C.*



*C.C. Crystallisatione volat. essent. p. 14.* traditus modus figendi volatilitatem Salis C. C. in Alcino itidem tentandus, qui eò redit, quodd Spiritum C. C. recens destillatum, & ab omni heterogeneitate ope filtri depuratum, per duorum vel trium mensium curriculum in locum frigidiorē reponat, & sic concretum crystallinum volatile, salis gemmæ pelluciditatem & splendorem æmulans, in fundum vitri instar circuli subsidere promittat, vitrò eximendum, & ablutis Spiritu Vini variis, quas in superficie sua ostendit, maculis flavescentibus, lenissimò Igne exsicccandum. Hasque crystallos communi Sali vol. longè præstantiores censet, ob duas quas *pag. 16.* addit rationes. "Non enim (inquit) earundem purificatione opus" est, quæ in rectificando vulgari via producto sale aliquoties reiteranda. Præterea nec de virtute sua aliquot etiam annis servatæ quicquam amittunt, quod vulgari sali est familiarissimum, dum non sine aliquali activitatis suæ dispendio notabili tempore durare possit."

### §. XXXI.

Dirigitur quidem & Olei à Spiritu per separatorium aut filtrum chartaceum sejuncti *Rectificatio*, si illud cum vitro pulverisato, vel silicibus, vel limatura Corn. Alc. crudi, vel Colcothare vitrioli, vel pane furfuraceo, vel cineribus elixiviatis mixtum per Retortam destilletur, aut affusò Spiritu vini in liquorem balsamicum pellucidum rubescentem exaltetur. Attramen, cum nihilominus fœtor ipsi inhæreat adversus, non faciliè internè præscribitur: quamvis non dubitemus, quin in temperando acido in corpore graviter peccante, corrigendâq; pituitâ viscidâ, convenientibus aliis combinatum voto exhibentis sit responsum. Quare plerumque usui tantum inservit externo, vel solum, vel cum Spiritu Corn. Alc. in frigidis Capitis & Cerebri affectibus, commissuræ coronali ac sagittali, item in sedandis torminibus colicis, flatibusque intestinorum discutiendis, regioni umbilici illitum.

### §. XXXII.

Majus autem atque certius solatium in foro Medico à  
E  
Spiri-

Spiritu & sale vol. Corn. Alc. sperandum, in sudore provocando, putredine argenda, acido quocunque invertendo, moribus epilepticis abruptendis, Asthmate pituitoso & convulsivo abigendo, salibus acris scorbaticis mitigandis, lumbricis fugandis, & simil. ipsis internè assumptis: Vel si Spiritus solus pro terminando ulteriore malignitatis progressu ulceribus cancris phagedænicis affricetur, vel nervinis maritatus in Arthritide, affectibus Ischiadicis, aliisque doloribus leniendis, parti affectæ externè inungatur: aut si Sal vol. vitro angustioris colli inclusum, tam pro excitandis Spiritibus animalibus torpidis, quàm obstructione, à lymphâ viscidâ ortâ, resolvendâ, Apoplecticorum, Epilepticorum, Hystericarum, Catalepticorum, & Lethargô, Carô, aliisque morbis soporosis pressorum, naribus admoveatur. Sal Cornu Alcis fixum, licet quadantenus vires Salis vol. æmuletur, censeatur tamen à multis ad calculum pellendum, & coagula Tartarea referenda præprimis proficuum, nec postremum inter digestiva locum meretur. Ita quoque Crystalli Salis vol. essentialis ad imitationem crystallorum à Waldschmidio in Spiritu C. C. productarum paratæ, & cervinis virtute minimè cedentes, si non antecellentes, tanquam sudoriferum satius potens, cum facultate incidendi, attenuandi, deobstruendique conjunctum, maximè profunt; præsertim, si juxta monitum ejusdem Autoris pulverisatæ cum calido herbæ Theæ potu singulis diebus, à scorbutô viscidô laborantibus horis matutinis in sufficiente, imò copiosâ hujus infusionis quantitate imbibantur.

#### §. XXXIII.

Restat adhuc in posteriori Medicamentorum ex Alcinis cornubus procreandorum Classe Cornu Ustum, quod obtinetur, si caput mortuum, à destillatione Spiritûs & Salis vol. Oleique relictum, vel Corn. Alc. crudi taleolas ollæ injicias, atque superimpositâ aliâ ollâ, rimis tamen non exactè clausis, Igni sub destillatione Spirituum mineralium committas; vel furno figulino imponas, usque dum vehementissimo aperti Ignis gradu ad perfectam albedinem calcinata fuerint. Hæc postmodum probè pulverisata in vitro cautè recto subfor-



formâ pulveris recondas, vel denuo in mortario marmoreo aut vitreo minutissimè, aquâ Rosar. vel aliâ aspersâ, conteras, & in placentulas ad consuetum hodiernis Pharmacopæis modum efformes. Usus verò hujus medicamenti censetur insignis ad vermes puerorum enecandos, alvi fluxum nimium sistendum, ulcera intestinorum consolidanda, bilem oleosam imbibendam, acidumque morbosum, multorum malorum autorem, absorbendum, æquè ac similia Terreo-alcalina concreta idem præstare solent. Tribuit & ipsi Fridericus-Hoffmannus, in *Animadv. ad Pharm. Schröderi*, virtutem proliciendi sudorem, quando *p. m.* 641. ita disserit: "Usum etiam observavimus diaphoreticum, licet particulæ salinæ cum Sulphureis sint demptæ; quæ illarum absentia vel diminutio nihil arguit; alia enim Ignis, alia stomachi est resolutio cum remedium adaptatione." Quibus colophonis loco annectimus, quæ idem Clariss. Vir. l.c. de Cornu Alcis viribus brevibus & velut in nucleo refert. Inquit autem: "Hic Cornu Alcis non prætereamus, D. Autor (Schröderus) hoc ipsum omisit, cum in Epilepticis insultibus, Variolis, Morbillis &c., vel cum Rafura, vel philosophicè s. Igne præparatum miræ sit virtutis, quâ nec caret ejus Sal vol. item Gelatina."

#### §. XXXIV.

Alcinum Cornu virtutum insitarum præstantiâ excipiant VNGULÆ; de quarum electione iterum inter se dissentiunt Medici, aliis nempe Unguem sinistrum pedis posterioris, aliis dextrum cæteris efficaciorē æstimantibus. Sic enim Olaus M. l.c. inquit: "Vngula exterior dextri lateris posterioris pedis Onagri masculi, qui non genuit, abscissa à vivo pede securi, vel alio instrumento avulsa, post medium Mensis Augusti, Spasmodum aut Morbum caducum patienti adhibita, continuò sanat." Quas tamen requisitas conditiones alii derident, & circumspiciunt omnes ungulas, omni tempore, etiam post mortem animalis, collectas hæc vi pollere, non sine ratione asserunt. Constant Salibus volatil. cum particulis oleosis in terreis multis inclusis, hincque non solum curatoriè, sed etiam præservativè Epile-

psiam auferre, & Hystericas excitare creduntur. Adulterantur interdum Ungulis bovinis cum quibus aliqualem habent affinitatem: sed odore facilè dijudicantur; bovinæ enim, si paululùm cultellò raseris, fœtorem spargent, Alcinae non item.

§. XXXV.

Usurpantur autem Ungulae vel Crudæ Præparatæ. *Crudæ* quatenus præservandi gratiâ particula ejus à quibusdam superstitiosè de collo suspenditur, vel annulus ex ea confectus digitò gestatur. Rectius in curatione ipsa Ungula in pulverem redacta cum aliis appropriatis v.gr. Rasur. Cran. human. Unicorn. marin. Antimonio diaphor. Cinnab. nativ. elect. pro scopo antepileptico usurpatur, aut cum anatica Zedoariæ & Sal vol. Succini parte mulieribus passione hysterica correptis internè exhibetur, vel externè pro animandis istis ungulae accensæ fumus in usum vocatur. Quæ enim Levinus Lemnius atque Mizaldus de Epilepsiâ per portionem ungulae auri immissam, & aliquamdiu inibi motam curatâ referunt, fidem fermè superant, nisi effluviis insignem efficaciam tribuerimus. Sub *Præparatorum* Classe veniunt *Ungulae*, si ad normam Augustanorum earum Rasura ab omni spurcitie liberata probe contundatur, & in mortario sufficiente quantitate aquæ Lilior. convall. irroretur, ut fiat pasta, exsicccanda, pulverisanda, & cum s. q. aquæ fl. Til. denuo in massam redigenda: idque tertiâ vice ex aqua fl. Pœoniæ repetatur: quarta verò vice ex aquâ Cerasor. nigr. impastetur, & in formâ pulveris ad usum reponatur. Prostat quoque ex Ungulis Magisterium, vel ad modum Magisterii ex cornubus Alcinis supra citati confectum, vel juxta præscriptum J. C. Barckhausen in *Pharmacop. Synoptic. p. m.* 102. sequ. methodo paratum. *ꝙ.* Ungul. Alc. mundificatas, coqu. tamdiu in aquam puram, donec omnis viscositatis fuerint expertes, postmodum eas dissolve in Aqua Forti & solutioni aquam calentem affunde, quibus refrigeratis instilla Oleum Tartari p. d. & obtinebis desideratum Magisterium ungularum Alcis, sub Pulveris albillimi formâ ad fundum delapsum, quod edulcoratum & exsiccatum usui reserva. Nam hac ratione & prægressâ diuti-

diutinâ coctione extruditur mucilago , quæ aliàs ob particularum suarum texturam impedimento est , quò minùs cornea ungularum substantia , hamulis earum quasi detenta & irretita, à menstruo affuso omnimodè possit dissolvi & disjungi , atque sic tantò faciliùs adveniente alcalino Tartari liquore, acidi menstrui poros opplente, Terreæ ungularum particulæ aggravantur & deorsum mittuntur. De cætero ex Vngulis polliceri nobis possumus Spiritum, Sal vol. & Oleum, si eodem ordine, eademque ratione cum illis ac cum cornubus Alcinis, ut suprà dictum est, procedamus, licet omnia quantitati & qualitati eorum, quæ ex cornubus proveniunt, exactè non respondeant.

### §. XXXVI.

Consideratis jam solidis ac durioribus Alcis partibus, earumque ad usum Medicum præparatis pœrioribus; æquum est, ut nunc de SANGUINE, fluidò illò primariò, quantum instituti nostri ratio exigit, paucis quoque agamus. Hic enim à mactatione adhuc calens Retortæ vitreæ inditus, & lenissimò Igne arenæ destillatus, præbet unà cum Sale vol. & Oleo *Spirium* copiosum, aurei coloris, parem, si non superiorem isti, qui è cornibus elicitur, per rectificationem pro lubitu purificandum, & ad eosdem cum Spiritu Corn. Alc. usus servandum. Præbet & *Aquam*, pro qua impetranda accipit Göbelius decem partes sanguinis, easque in vitro benè sigillato ad putrescendum in fimo equino vel columbino, collocat, singulis septimanis vitrum eximens & fortiter commovens, ut ima summis probè invicem misceantur; hæc per quadraginta dies continuandò: quibus elapsis omnia ita mixta in alembicum ad eliciendam aquam per destillationem ponit, Igne satis forti subiecto. Reliquias exsiccatas cacabo eximit, atque in marmore conterit, pluribus vicibus affusâ Aquâ stillatitiâ extractionem reiterandò, donec aliquam fragrantiam non ingratam acquirat, quam Quintam Essentiam sanguinis Alcini vocat, tam ad secretos usus ab ipso frequenter collectam, quàm internè contra morbos malignos cum addito Spiritu Corn. Alc. propinatam, aut externè ad fovenda membra tabida l. purificandas fistulas usurpatam.

### §. XXXVII.

Tandem post magis usitata ad minus ex Alce usualia devolvimur; quæ inter numeramus Nervos, Medullam & Adipem. Nam ex NERVO aptatur Zona, quæ in Aquâ Lumbric. terrestrium prius humectata, vel medullâ Alcis inuncta, & dein membro spasmodum patienti circumligata paroxysmum tollit. MEDVLLAM osium Göbelius, experientiâ Parentis, qui ægrum Arthritide per triennium laborantem & penè desperatum illitâ hâc medullâ valetudini pristinæ restituit, confirmatus tanti facit, ut eam basin constituat Vnguenti ab Apoplexia præservantis, ꝛ. Medullæ Crurum Alcis 3j. Olei Nuc. Mosch. Olei Succin. alb. Olei Anis. ana. gutt. x. vel. xv. Ambræ. Moschi, Zibethi, pulv. Vngul. Alc. subtiliter tritæ ana gr. vij. misc. cum cera alba, ut fiat Vnguentum, quò sutura coronalis interdum inungatur, aut tempora irrigentur. Ita quoque ADIPEM Alcis, utpote exsiccantem, emplastris quæ exsiccandi & digerendi potentia opus habent, addere suadet, vel etiam destillare, ut magis tenuium evadat partium, & per se sine ullo additamento linimenti instar uti.

### §. XXXVIII.

Reliquum nunc esset, ut indicarem, quænam medicamenta ex his recensitis præparatis possint componi, quibusve pharmacis hinc inde queant substitui: Verùm cum hâc ratione positos & consuetos Dissertationis terminos nimia prolixitate excederemus, hîc filum abrumpimus, ea prudentis Medici arbitrio atque judicio relinquentes, & B. L. obnixè rogantes, ut velit specimen hoc æquis oculis aspicere, & cum tempore à perfectioribus nostris annis perfectiorem hujus materiæ exarationem expectare. Atque sic Infinito Numini pro Divinâ Benignitate & Clementiâ nobis concessâ humillimis persolutis gratiis, præsentî

Dissertationi felicem ponimus

TERMINVM.

COROL-



## COROLLARIA.

I. *Cæcum de colore, & Surdum de sono judicare posse, experientia testatur.*

II. *Sensus Auditûs nobilior est Sensu Visûs.*

III. *Sonus non motu undulante, sed rectilineo ad auditûs organum pervenit.*

IV. *Cerumen Aurium etiam confert ad Auditum perficiendum.*

V. *Fumum Herba Nicotiana ore haustum ex aure per meatum auditorium egredi posse, non ampliùs singulare vel miraculosum quid censetur.*

VI. *Compressio digitorum in utraq, manu compescit incipientem Singultum.*

VII. *Paracenthesis thoracis tempore expirationis est instituenda.*

VIII. *Mundificatio vulnorum plus prodest ad sanandum, quàm mille olea & unguenta.*


IX. *Congrua partis lassa deligatio, & spleniorum scita applicatio, sunt vera Chirurgorum arcana.*

X. *Folia auri minutissimè concisa à quibusdam post usum mercurialium non sine ratione internè cum fructu exhibentur.*

XI. *Impossibile est ab Alchymistis omni arte produci posse aurum nativo æquivalens.*

XII. *Consultiùs est ex medicamentis Aurum, quàm ex Aurò medicamenta comparare.*

Vir



*Vir Nobilissime, Clarissime,*  
FAVOR ET AMICE  
Honorande.

Ξείνων δ' ὃ πρᾶσσόντων, ἔσαναν  
'Αυτικ' ἀγγελίαν  
Ποτὶ γλυκείαν ἐδόλοι.

*Amicis autem feliciter agentibus, congaudere so-  
lent (congaussi sunt)*

*Statim nuntium  
Ad dulcem boni.*

Id quod in *Psaumidis Camatinai* honorem cecinit *Pindarus* Ol. Δ. α. 6, 7, 8. Tibi quoque accinere jubet ipse, quem literis misisti, nuntius dulcis, imò multis nominibus gratissimus, qui certiores nos reddidit de felici itineris progressu, æquè ac aliarum rerum optata prosecutione, quas laudabili desiderio incensa voluntas Tua in Illustri Academia Basileensi peragere Tibi persuasit.

Θεὸς Ἑφρων  
'Εἰη λοιπαῖς ἄχαϊς. Plin. Ol. c. a. 6, 7.  
*Deus propitius*

*Sit reliquis votis,*

Quæ vel alii fundunt, vel ipse Tibi, imò quæ merita Tua postulant. Merita in Rem Medicam æquè ac Literariam, speciatim quoque Historiam Naturalem, quæ fanè *σωτηριὸν ἔστι πρῶγμα, καὶ φύσει ἐνυπάρχει τοῖς ἀνθρώποις*. Quid verba facio, ubi rerum Testimonia adsunt? Loquetur, quam omnium cum applausu defendes, quia omni cura in eam conficiendam incubuisti, Disputatio Tua Inauguralis, quam sedula non minùs doctæque elaboratio, ac raritas materiæ de optima nota commendant. In ea quippe vivimus eruditionis omnigenæ vespera, quâ peractò etiam rerum seligendarum spicilegio nobis vix

bis vix ulla grana relinquuntur, ut hinc in ipsa copia destitutamur inopes, ὡς περ ἡ ἐδοξεν αὐτοῖς πάντα λαβεῖν, & pluris sæpe æstimanda veniat materie aptæ selectio, quàm elaboratio. Spectat hæc Tua de *Alce* doctrina ad excolendam Historiam Patriæ Naturalem, & omnes simul Medicinæ angulos perrepat, dico, partes attingit, ut id faciliè demonstratu foret, si per partes ire liceret. Gratulationi huic, quam brevem esse cupio, simulque sinceram, ut tantò gratior accedat, comitem jungo ob affinitatem materiæ, quò sic uni Ceratologia Cervinæ ambo litemus, Historicam relationem de *Cervæ Cornuta*, in districtu Rafzensi captâ, quam Virgo nobilis virtutibus æquè ac generis antiquâ profapiâ aliquandiu (sed nondum cornutam) habuit ubique pedissequam, ἐλαφιοφῶν Tigurinum per triennium circiter ad annum usque 1697. aluit, & nunc Museum Civicum Tigurinum ex liberalitate Magnifici Nobilissimique VIRI, Dn. *Wilbelmi Blaureri*, Redituum Ecclesiasticorum Archieconomi, & Fossæ Cervinæ, Venationibusque Praefecti possidet. In Agro Tigurino natam & educatam scias velim Cervam nostram, ne fortè suavi Te demulceas, ast vanâ spe, adducturum me Tibi illam,

Χρυσαέρευν ἐλαφὸν Θήλειαν,  
Auricornem Cervam foeminam,

Quam *Pindaro* teste Ol. r. B. 7. &c. olim *Taygeta* filia *Atlantis* *Diana* consecravit, vel *κεραιοφῶρον* illam apud *Sophoclem*, aut *κεραιοσσαν* ἐλαφὸν apud *Euripidem* in *Iphigenia*, aut *κεραιοσσαν* apud *Anacreontem* de *Cervæ*, vel *Cervas Cornutas* alias, quarum mentio fit apud *Stalig.* l. 3. Poët. & ex eo *Rittershus.* ad v. 177. lib. 2. *κυν.* *Oppian.* *Ælian.* l. 7. de *Animalib.* c. 39. *Ionstn* *Thaummatograph.* *Natur.* f. admirand. quadruped. c. 10. p. 298. *Eph. Germ.* Dec. I. Ann. 9. p. 225. & alij fortè, quorum tamen meminisse parum juvabit. De productione hujus Cornu quum procul dubio mecum sis sollicitus, hæc, quæ rudis *Minerva* mihi suggerit, paucis habe, aliorum enim in hanc rem opiniones vel examinare, vel refutare nec voluntas suadet, nec angustia *Epistolii* exigit, nec concisa temporis brevisitas permittit. Hoc quidem faciliè patientur oculatissimi *Malpighij* manes, ut ab analogia *κεραιογενείας* in maribus, quam pro more subtiliter,

F & ob-



& observationibus ab ipso factis convenienter deduxit, tan-  
rillum discedam; Prohibent enim circumstantiæ quædam,  
quod minus Cornu hocce sceminini generis deducam ex ulterio-  
ri papillarum rorij, & reticularis corporis productione, sicuti Cornuum  
ordinaria in maribus vegetatio ex ipsius sententia huc in com-  
pendium redit, vel etiam ex conatu interioris tumoris à copioso  
fortasse succo in continuatas cutis papillas elabente, easq; adjuvante  
compressione elongante, sicut monstruosum Cornu è collo Bovis enatum,  
& Museo Aldrovandino postea consecratum ortum traxisse vult  
Celeb. Malpighius. Est hoc, quod lustrandum suscepimus,  
Cornu digitorum unum crassum, & duos longum, & prolon-  
gata quidem eminentia ossis frontis sinistra, quam Cornu vo-  
cat Albucasis, Dionysiscum alij, adeoque continuum ipsi Cranio,  
dum, quod idem est, lamina Calvariæ exterior elongata ob-  
tegit spongiosam intus protuberantiæ Cornuformis substan-  
tiam, quam ipsam diploen seu cavernosum Cranij meditul-  
lium protensum esse perhibeo. Procrevit itaque, ut facilitio-  
rem tantò reddam ac citiorem ex præmissis indubiis subsum-  
tionem hæc ἐξ ὧν, vel potius ἐξ ὧν ita, ut lamina Cranij  
exterior in teneræ constitutionis Cerva fuerit, sive à causa  
externa, fortè Cervo mare petulante, & idum durum intun-  
dente, vel Lapidis jactu, aliave, sive ab interna, copiosiori  
scil. vel protrusione succi nutritij, vel acrioris erosione, læsa,  
unde fibræ in loco affecto laceratis, divisis, vel contusis cir-  
culatio fuit impedita, stagnatio Sanguini ac succo alibili in-  
ducta, à novo semper continuante affluxu fibræ ipsæ jam in  
tono debilitatæ fuere extrorsum protrusæ quibus per succes-  
sivam nutritionem elongatis, & cavernosâ interiori substan-  
tiâ itidem protensâ καὶ ἀπορροῇ hæc ἐξ ὧν, fuit genita & in  
tantam quidem longitudinem, qualem etiamnum in sceletro  
capitis videre licet. Eadem ratio cornuum è capitibus homi-  
num exerescentiam possibilem reddit, quam experientia con-  
firmat, testantibus id plurimis observationibus, quarum con-  
gestionem consultò omitto. Morbosum esse ipsum, quod  
præsenti considerationi subjecimus Cornu, vel inde quoque  
patet, quod ad basin angustius id sit, & lævius, versus api-  
cem verò scabrum magis, & verrucosis veluti nodis tumi-  
dum,

dum. Sic quidem sese terminat *αἰτιολογία*, cui instituendæ ansam dedit ipsa Tua doctissima de *Animali Septentrionalium Magno* Cornigero Dissertatio, nondum tamen finem Epistolæ pono, tacturus aliud porro phænomenon non minus rarum, quod huic Cervæ Cornigeræ contigit. Replebant Vterum oscicula spongiosæ levitatis albida, quæ etiamnum mecum asservo, unde colligo, embryonem secundo vel tertio circiter mense vitam ante amisisse, quàm in vitales prodierit auras, & ipsam Cornigeram matrem dubio procul non parùm torfisse, ipsque circiter symptomatibus afflixisse, quæ ex foetu in Utero mortuo matribus contingere solent, quamvis læta semper discurrerit, & nec mortem nec morbum inde passa fuerit. Huc facit Observatio Clar. Dn. D. *Joh. Baptista Wénckh*, de *Muliere*, qua existente in Utero osciculorum congerie ex mortuo foetu relicta, denuò bis concepit, feliciterq; peperit, inserta *Ephem. Germ. Dec. III. Ann. IV. obs. 87.* Hisce, quæ subducto probè supercilio evolvi merentur, utpote exactiori examine dignæ, nunc autem ob temporis angustiam impolita, nec ullam limam passa transmitto, contentus Vale, *φίλιππον καὶ ἀγάπην*, & amare perge

### Totum Tuum

Dabam Tiguri 14. Calend.  
Maij. st. v.

D. JOH. JAC. SCHEUCHZER,  
N. C. Acarnan.

Iamne




Amne Tuum Nomen non Balthica littora tantum,  
 Vnde Tibi primæ laudis origo venit,  
 Sed Rhenum resonare doces, & Rauraca Pindi  
 Culmina, non uno cognitus ante loco.  
 O Decus, ò nostræ Spes jam matura Lubecæ,  
 Digne Tuâ Patriâ, Stemmata digne Tuò!  
 Fama Tui dudum servit GENITORIS honor,  
 Debet Ei multas cultior orbis opes,  
 Qui nova Doctorum dum colligit æta Virorum,  
 Illustrat calamò scripta aliena suò.  
 Æmula Tu soboles paria his moliris, A MICE,  
 Dum Naturalem colligis Historiam,  
 Testis in Arctoïis celebris regionibus ALCE,  
 De qua jam studiò multa sagace doces,  
 Et simul egregio certamine scripta tuendo,  
 Inde refers meritis digna brabea Tuis.  
 Nescio cui primùm nunc gratuler; anne PARENTI,  
 Cujus in hoc Nato sic revirescit honos?  
 An, quia vivit, AVO, celebri nostræ Urbis Atlanti,  
 Cui parit hæc rarâ gaudia sorte Nepos?  
 An PATRIÆ, toties quod ab unâ Stirpe, Domoque  
 Aucta sibi decora & multiplicata videt?  
 Anne Tibi potius, Juvenis Clarissime, cujus  
 Impletur titulis fama subinde novis?  
 Imò (quid ambiguum est?) ego gratulor omnibus æquè,  
 Perpetuumque hoc sit omnibus, opto, Decus.  
 Floreat in Patriâ florente PARENTIS AVIQUE  
 Gloria, Vita, Salus, quin &, A MICE, Tua.  
 Succedant sic cuncta Tibi, Tuque Ipse propages  
 Nomine cum Patrio nomen in orbe Tuum.

*Hæc Nobilissimo Dn. Respondenti, Fautori & Amico suo  
 pro fus singulari in perpetuum amicitia  
 monumentum posuit*

C. F. FABRICIVS, Basedovio-Megapolitanus.

F I N I S.

1065 4











MC

